



Republika e Kosovës
Republika Kosova-Republic of Kosovo
Qeveria-Vlada-Government

Ministria e Mjedisit, Planifikimit Hapësinor dhe Infrastrukturës
Ministarstvo Životne Sredine, Prostornog Planiranja i Infrastrukture
Ministry of Environment, Spatial Planning and Infrastructure

Ministri i Ministrisë së Mjedisit, Planifikimit Hapësinor dhe Infrastrukturës,

Në mbështetje të nenit 14 paragrafi 7 të Ligjit Nr. 08/L-237, për Kadastër të pronës së pa luajtshme (Gazeta Zyrtare e Republikës së Kosovës Nr. 2/09 Janar 2024), nenit 11, paragrafi 1, nën paragrafi 1.5 të Ligjit Nr. 08/L-117 për Qeverinë e Republikës së Kosovës, (Gazeta Zyrtare, Nr.34/22 dt. 18.11.2022), si dhe nenit 38 paragrafit 6 të Rregullores së Punës së Qeverisë Nr. 09/2011 (Gazeta Zyrtare Nr.15, 12.09.2011),

Nxjerrë:

**UDHËZIM ADMINISTRATIV (MMPHI) NR.06/2024 PËR DHËNIEN E LEJES
KOMPANIVE GJEODEZIKE DHE LICENCIMIN E GJEODETËVE**

Neni 1
Qëllimi

Me këtë Udhëzim Administrativ përcaktohen procedurat, kushtet dhe kriteret e dhënies së lejes kompanisë gjeodezike, dhe licencimit të gjeodetit, emërimi, përbërja dhe puna e Komisionit për leje dhe licencim si dhe tarifatat për dhënien e lejes dhe licencës.

Neni 2
Fushëveprimi

Dispozitat e këtij Udhëzimi Administrativ zbatohen nga Agjencia Kadastrale të Kosovës, zyrat kadastrale komunale, gjeodetët e licencuar dhe kompanitë gjeodezike të pajisura me leje.

Neni 3
Përkufizimet

1. Shprehjet e përdorura në këtë Udhëzim Administrativ kanë këtë kuptim:

1.1. **Person fizik i licencuar apo person juridik i pajisur me leje**—gjeodeti i licencuar, kompania gjeodezike e pajisur me leje, tekniku gjeodet i licencuar; dhe personin zyrtar të certifikuar;

2. Shprehjet tjera të përdorura në këtë Udhëzim Administrativ kanë kuptimin si në përkufizimet e parapara në Ligjin Nr. 08/L-237 për Kadastër të pronës së paluajtshme.

3. Në kuptim të këtij Udhëzimi Administrativ emrat në gjininë mashkullore nënkuptojnë edhe emrat në gjininë femërore dhe anasjelltas, pa diskriminim.

Neni 4

Punët dhe shërbimet kadastrale të kompanisë gjeodezike të pajisura me leje dhe gjeodetit të licencuar

1. Kompanitë gjeodezike të pajisura me leje dhe gjeodetët e licencuar kryejnë këto punë dhe shërbime kadastrale:

1.1. Matjet kadastrale për krijimin e njësive kadastrale;

1.2. Caktimi i kufirit të parcelave dhe ndërtesave nga të dhënat zyrtare;

1.3. Ri rregullimi i kufirit të parcelave;

1.4. Identifikimi i njësive kadastrale;

1.5. Matjet gjeodezike dhe barazimi i rrjetave të rendit të III-të dhe rrjetave poligonale;

1.6. Krijimi i lëndës për azhurnimin e të dhënave në RDPP;

1.7. Kryerja e punëve gjeodezikegjeodezike dhe kadastrale në projektet:

1.7.1. për rregullimin e tokave;

1.7.2. rindërtimin e kadastrit;

1.7.3. kadastrit të ndërtesave;

1.7.4. kadastrit të përçojave.

1.8. Rilevimet topografike për nevojat e projekteve dhe për krijimin e hartave me paraqitje topografike;

1.9. Përgatitja e studimit për shpronësime për ndërtimin e objekteve të interesit shtetëror;

1.10. Ekspertiza profesionale për nevojat e institucioneve dhe qytetarëve;

1.11. Caktimi i të dhënave nga planet urbanistike për objekte individuale dhe kolektive, si dhe përcjellja e tyre;

1.12. Konsulta profesionale;

1.13. Matjet gjeodezike për barazim të rrjetave shtetërore të rendit të III-të duke përfshirë rrjetin e nivelimit dhe matjet gravimetrike.

Neni 6

Kushtet për licencim të gjeodetit

1. Personi fizik mund të licencohet si gjeodet i licencuar nëse i plotëson këto kushte:

1.1. të jetë shtetas i Republikës së Kosovës;

1.2. të dorëzoj certifikatën mjekësore që personi është i aftë për punë;

1.3. të gëzoj integritet personal dhe profesional;

1.4. të ketë së paku përgatitjen profesionale bachelor i gjeodezisë;

1.5. të ketë së paku dy (2) vite përvojë në punët e gjeodezisë ose të kadastrës, pas diplomimit;

1.6. të ketë të dhënë testin e licencimit për punë në lëmin e gjeodezisë dhe të kadastrës të organizuar nga AKK;

1.7. të dëshmojë nga organi kompetentë se nuk është në marrëdhënie pune;

1.8. të ketë në pronësi instrument profesional për matje, GPS apo stacion total;

1.9. të dëshmojë se instrumenti për matje është i certifikuar dhe plotëson standardet teknike për kryerjen e punëve profesionale dhe të shërbimeve kadastrale;

1.10. të dëshmojë pronësinë apo marrjen me qira të hapësirave punuese dhe pajisjet për zyrë, të nevojshme për ushtrimin e detyrës së gjeodetit të licencuar;

1.11. të dëshmojë me vërtetim nga gjykata kompetente se nuk është i dënuar mbi gjashtë (6) muaj burgim me vendim të formës së prerë, në dy vitet e fundit;

1.12. personi i cili kërkon licencimin sipas këtij Udhëzimit Administrativ, i cili është i punësuar me orar të plotë të punës, obligohet të dorëzojë aktin e dorëheqjes nga puna, në afat prej tetë (8) ditësh nga dita e publikimit të rezultatit të testimit.

1.13. personi i cili kërkon licencimin sipas këtij Udhëzimit Administrativ është i obliguar që veprimtarinë ekonomike ta regjistroj si “Biznes Individual” B.I. në pajtim me Ligjin përkatës për Shoqëritë Tregtare dhe të hap llogarinë bankare në emër të këtij biznesi brenda afatit prej 30 ditë nga dita e licencimit.

1.14. për plotësimin e kushteve të kërkuara nga ky nen, AKK-ja është e obliguar të përpiloj listën kontrolluese.

Neni 7

Kufizimet e licencës së gjeodetit të licencuar

1. Gjeodeti i licencuar është i kufizuar në veprimet e mëposhtme si:

1.1. nuk ka të drejtë të jetë në marrëdhënie pune me orar të plotë;

1.2. nuk mund të ketë më shumë se një zyre brenda territorit të Republikës së Kosovës;

1.3. nuk mund të ketë në marrëdhënie pune për punë teknike punëtorë me shkollim minimal tjetër përveç teknik të gjeodezisë, i cili duhet të jetë i autorizuar nga gjeodeti i licencuar para organit kompetent.

Neni 8

Kushtet për dhënien e lejes për kompani gjeodezike

1. Kompania gjeodezike pajiset me leje, kur i plotëson këto kushte:

1.1. të jetë e regjistruar në regjistrin e bizneseve në organin kompetent dhe të vepron si Shoqëri në pajtim me Ligjin përkatës për Shoqëritë Tregtare;

1.2. Të ketë në marrëdhënie pune të paktën dy (2) gjeodet të licencuar, të evidentuar në Administratën Tatimore të Kosovës si të punësuar të kompanisë, e cila pajiset me leje;

1.3. personat fizik nga paragrafi 1.2 i këtij neni mund të jenë në marrëdhënie pune vetëm me një kompani të licencuar:

1.4. të ketë në pronësi, pajisjet dhe instrumentet profesionale për matje GPS dhe Stacion Total, dhe të çertifikuara që i plotësojnë standardet teknike për kryerjen e punëve profesionale dhe të shërbimeve kadastrale;

1.5. të dëshmoj mbi pronësinë apo marrjen me qira të hapësirave punuese;

1.6. të ketë pajisjet për zyre, të nevojshme për ushtrimin e detyrës së kompanisë gjeodezike të licencuar.

Neni 9

Kufizimet e lejes së kompanisë gjeodezike

1. Kompania gjeodezike që i është dhënë leja, është e kufizuar në veprimet e mëposhtme:

1.1. kompania gjeodezike të cilës i është dhënë leja, mund të ketë më shumë se një zyre brenda territorit të Republikës së Kosovës, vetëm pas marrjes së pëlqimit nga Komisioni për Leje dhe Licenca, sipas paragrafit 1.2. të këtij neni;

1.2. kompania gjeodezike që i është dhënë leja, e cila kërkon pëlqimin për hapjen e më shumë zyrave brenda territorit të Republikës së Kosovës, së paku duhet të:

1.2.1. siguroj kushtet për zyre sipas paragrafit 1.5. të nenit 8 të këtij Udhëzimi Administrativ;

1.2.2. ketë të regjistruar filialin përkatës në Agjencinë për Regjistrimin e Bizneseve të Kosovës dhe

1.2.3. ketë të punësuar gjeodet te licencuar dhe një person fizik i cili e ka shkollimin minimal teknik i gjeodezisë për çdo zyre të re të hapur.

1.3. Nënshkrimin e lëndëve duhet të bëhet nga gjeodeti i licencuar i kompanisë ose personi fizik me të cilin kompania i plotëson kriteret për marrjen e lejes..

Neni 10

Kompanitë e huaja gjeodezike

1. Kompanitë e huaja gjeodezike të regjistruara dhe të licencuara jashtë Republikës së Kosovës mund të kryejnë punë dhe shërbime kadastrale apo gjeodezike në Republikën e Kosovës vetëm në rastin kur janë të kontraktuara sipas legjislacionit përkatës.

2. Punët dhe shërbimet kadastrale duhet të kryhen vetëm sipas kushteve të kontratës dhe specifikave teknike.

Neni 11

Llojet, forma dhe përmbajtja e licencës

1. AKK lëshon leje për kompanitë gjeodezike dhe licenca për gjeodetët për:

1.1. kryerjen e matjeve kadastrale dhe

1.2. kryerjen e matjeve gjeodezike.

2. AKK është përgjegjëse për përcaktimin e formës dhe përmbajtjen së lejes dhe licencës, si:

2.1. licencë për gjeodet; dhe

2.2. leje për kompani gjeodezike;

Neni 12 **Kërkesa për leje apo licencim**

1. Kërkesën për dhënien e lejes për kompaninë gjeodezike e paraqet përfaqësuesi i kompanisë, ndërsa për licencimin e gjeodetit, e paraqet vetë personi fizik.
2. Kërkesa për leje apo licencim, së bashku me dokumentacionin e nevojshëm, duhet t'i paraqitet komisionit të AKK-së për leje apo licencë.
3. Me kërkesën për dhënien e lejes, kompania gjeodezike dorëzon dëshmitë se i plotëson kushtet për leje sipas nenit 8 të këtij Udhëzimi Administrativ, ndërsa personi fizik dorëzon dëshmitë se i plotëson kushtet për licencim si gjeodet, sipas nenit 6, të këtij Udhëzimi Administrativ.
4. Me aprovimin e kërkesës për leje apo licencim duhet të paguhet tarifa si në vijim:
 - 4.1. Tarifa për gjeodet të licencuar është treqind (300) euro.
 - 4.2. Tarifa për kompani gjeodezike të licencuara është pesqind (500) euro.
5. Tarifat e përcaktuara në paragrafin 4 të këtij neni, përfshijnë edhe të gjitha trajnimet që do të organizohen nga AKK.
6. Niveli i tarifës për licencim i paraparë në paragrafin 4 të këtij neni reflekton koston dhe kohën e kryerjes së shërbimeve për lëshimin e lejeve apo licencave për personat e licencuar.

Neni 13 **Komisioni për Leje dhe Licenca**

1. Dhënia e lejes kompanisë gjeodezike dhe licencimi i gjeodetit bëhet nga Komisioni për Leje dhe Licenca i cili emërohet nga Drejtori Ekzekutiv i AKK-së.
2. Komisioni përbëhet prej tre (3) anëtarëve, prej tyre:
 - 2.1. një(1) anëtar i propozuar nga Drejtori Ekzekutiv i AKK-së, kryetar i komisionit;
 - 2.2. një (1) anëtar jurist i propozuar nga Ministria, anëtar;
 - 2.3. një (1) anëtar i propozuar nga Oda e Gjeodetëve. Deri në themelimin e Odes së Gjeodetëve anëtari i tretë do të propozohet nga Shoqata e Gjeodetëve të Kosovës, anëtar.
3. Mandati i anëtarëve të komisionit për shqyrtimin e kërkesave për leje apo licenca është një (1) vit.

Neni 14

Shqyrtimi dhe vlerësimi i kërkesës për leje apo licencim

1. Komisioni për leje apo licenca është i obliguar që gjatë një viti kalendarik të trajtoj katër (4) herë kërkesat për licencimin e gjeodetëve, lëshimin e lejes për kompanitë gjeodezike.
2. Pranimi i kërkesave bëhet gjatë muajit Janar, Prill, Korrik dhe Tetor, të çdo viti kalendarik.
3. Dorëzimi i kërkesës duhet të bëhet brenda pesëmbëdhjetë (15) ditëve dhe atë nga data 01-15 të muajve të cekur në paragrafin 2. të këtij neni.
4. Shqyrtimi i kërkesave bëhet brenda afatit prej pesëmbëdhjetë (15) ditëve pas mbylljes së afatit për pranimin e kërkesave.
5. Kur Komisioni për Leje dhe Licenca konstaton se të dhënat nuk janë ofruar apo dokumentacioni nuk është bashkangjitur në pajtim me dispozitat e këtij Udhëzimit Administrativ, kërkesa hidhet poshtë.
6. Në rast të kërkesës të paqartë ose e cila duhet të plotësohet, Komisioni kontakton paraqitësin e kërkesës për sqarime të mëtejshme apo plotësimin e kërkesës në një afat të arsyeshëm kohor. Këtu përfshihen edhe rastet kur Komisioni ngrit dyshime për vërtetësinë e të dhënave ose dokumenteve të paraqitura, me ç'rast aplikuesi detyrohet të paraqes në formë fizike dokumentin e kontestuar.
7. Komisioni ka të drejtë të verifikoj vërtetësinë e dokumentit edhe përmes organit që e ka lëshuar atë.
8. Kur parashtruesit e kërkesës i plotësojnë kushtet për leje apo licencim, komisioni nxjerrë vendimin për dhënien e lejes apo licencimin e tyre.
9. Leja apo Licenca lëshohet për kohëzgjatje prej pesë (5) vitesh.
10. Licenca dhe leja lëshohen në formë fizike origjinale dhe të njëjtat mund të shkarkohen gjithashtu në çdo kohë nga sistemi elektronik.

Neni 15

Refuzimi i kërkesës për Leje apo Licencë

1. Komisioni për leje apo licenca në AKK me vendim mund të refuzoj kërkesën e parashtruar nga subjekti për marrjen e lejes apo licencës për këto arsye:
 - 1.1. ofrimi i të dhënave jo të plota dhe jo të sakta nga ana e parashtruesit të kërkesës edhe pas kërkesës të Komisionit për qartësimin apo plotësimin e tyre;
 - 1.2. mos kompletimi i dokumentacionit në kohën e caktuar;

- 1.3. mos plotësimi i kushteve të kërkuara për dhënien e lejes apo licencimit.
2. Në rastin e refuzimit të kërkesës, komisioni duhet të merr vendim në të cilin i paraqet arsyet e refuzimit.
3. Kundër vendimit të komisionit për leje dhe licenca, pala e pakënaqur mundet të paraqet ankesë në Komisionin për shqyrtimin e ankesave në AKK, brenda afatit prej 30 ditësh nga dita e pranimi të vendimit për refuzimin e kërkesës për licencim.

Neni 16

Kartela identifikuese

1. Kompanitë gjeodezike të cilave u është lëshuar leja, gjeodetët e licencuar, nga AKK, pajisen me kartelë identifikuese.
2. Kartela identifikuese ka afatin e vlefshmërisë të licencës apo lejes.
3. Kompanitë gjeodezike, gjeodetët janë të obliguar që kartelën identifikuese ta përdorin në të gjitha rastet kur kryejnë aktivitete sipas nenit 4 të këtij Udhëzimi Administrativ.

Neni 17

Ndryshimet e kushteve nga personi fizik i licencuar apo personi juridik i pajisur me leje

1. Për të gjitha ndryshimet që ndodhin te personi fizik i licencuar apo personi juridik i pajisur me leje, sipas këtij Udhëzimi Administrativ, duhet të njoftohet komisioni për leje apo licenca në afatin prej tetë (8) ditësh nga dita e paraqitjes së ndryshimeve.
2. Për ndryshimet për të cilat AKK-ja është informuar dhe të cilat kanë ndikim në kushtet e licencimit, komisioni për leje apo licenca merr vendim për këto ndryshime.
3. Kundër vendimit të komisionit mund të ushtrohet ankesë në Komisionin për shqyrtimin e ankesave në AKK, brenda afatit prej tridhjetë (30) ditëve nga dita e pranimi të vendimit.

Neni 18

Obligimet e personit fizik të licencuar apo personi juridik të pajisur me leje

1. Personi fizik i licencuar apo personi juridik i pajisur me leje sipas këtij Udhëzimi Administrativ është i obliguar që:
 - 1.1. punët profesionale të kryhen në bazë të të dhënave zyrtare, të cilat merren nga ZKK-ja apo AKK-ja;
 - 1.2. punët profesionale të kryhen në pajtim me dispozitat e legjislacionit në fuqi si dhe sipas standardeve dhe etikës profesionale;

- 1.3. punët, shërbimet dhe llogaritja e çmimeve për shërbimet e kryera, bëhet sipas tarifave të përcaktuara në dispozitat ligjore në fuqi e cila duhet të dëshmohet me faturë ose kupon fiskal;
- 1.4. ti trajtoj në mënyrë të barabartë dhe të drejtë kërkesat e palëve për kryerjen e punëve profesionale, pavarësisht nga ndërlikimi, vendi dhe koha e kryerjes së punëve;
- 1.5. nuk ka të drejtë, të refuzoj pa arsye, kryerjen e punëve profesionale sipas kërkesës së palës;
- 1.6. zyra të jetë funksionale gjatë orarit të rregullt të punës, përveç në rastet e angazhimeve të arsyetuara në terren.
- 1.7. të lajmëroj ZKK-në dhe AKK-në për pengesat e arsyeshme në kryerjen e punëve profesionale, të cilat zgjasin mbi një muaj.
- 1.8 pengesa të arsyeshme konsiderohen: mungesa e arsyeshme nga puna sipas ligjit; kushtet e vështira atmosferike; kushtet e rënda për punë në terren dhe raste të tjera që e bëjnë të pamundur kryerjen e punëve profesionale;
- 1.9. lajmërimi duhet të bëhet në afatin prej tre (3) ditësh nga dita e paraqitjes së pengesave. Vlerësimin e pengesave dhe arsyeshmërinë e tyre e bën AKK-ja;
- 1.10 me urdhër të ZKK-së, ose të AKK-së, të përsërit kryerjen e punëve profesionale me shpenzimet e veta dhe me pëlqimin e palës nëse është vlerësuar që punët nuk i plotësojnë kriteret ligjore dhe profesionale;
- 1.11. për çdo vit të bëjë raport vjetor të punës dhe të njëjtin ta dorëzoj në AKK, më së largu deri me 31 mars të vitit në vijim, për vitin paraprak.
- 1.12. lista e tarifave dhe orari i punës duhet të jenë të qasshme për publikun.

Neni 19

Ofrimi i të dhënave dhe shënimeve kadastrale

1. ZKK-ja është e obliguar që me kërkesën e personit fizik të licencuar apo personit juridik të pajisur me leje, sipas këtij Udhëzimi Administrativ, t'i ofroj të dhëna dhe shënime të cilat i posedon, pas pagesës së kryer sipas tarifave të përcaktuara.
2. Afati për dhënien e shënimeve është tri (3) ditë pune nga dita e parashtrimit të kërkesës me shkrim.
3. Kur ZKK-ja nuk i ofron të dhënat sipas afatit të përcaktuar në paragrafin 2 të këtij neni, personi fizik apo juridik, mund të parashtrojnë ankesë në AKK, e cila duhet t'ia kthej përgjigjen për këtë çështje brenda afatit prej pesë (5) ditë pune.
4. Agjencia Kadastrale e Kosovës mbanë regjistrin publik të gjeodetëve dhe kompanive gjeodezike.

Neni 20
Arsyet për pushimin e lejes së kompanisë gjeodezike

1. Kompania gjeodezike pushon veprimtarinë e saj, kur:
 - 1.1. shuhet kompania gjeodezike;
 - 1.2. hapet procedura e falimentimit apo likuidimit;
 - 1.3. me aktgjykim të formës së prerë të gjykatës i është shqiptuar ndalesa e ushtrimit të veprimtarisë;
 - 1.4. për shkaqe të paarsyeshme nuk e fillon ushtrimin e veprimtarisë në afat prej katërdhjetë e pesë (45) ditësh nga dita e dhënies së lejes;
 - 1.5. pushojnë së plotësuari kushtet, në bazë të të cilave kanë marrë lejen.

Neni 21
Arsyet për pushimin e veprimtarisë së gjeodetit të licencuar

1. Gjeodetit të licencuar i pushon veprimtaria:
 - 1.1. në rast të vdekjes;
 - 1.2. me dorëheqje me shkrim;
 - 1.3. kur me aktgjykim të formës së prerë të gjykatës është dënuar për veprën penale shpërdorim në detyrë apo është dënuar me dënim me burg pa kusht mbi gjashtë (6) muaj, ose i është shqiptuar ndalesa e ushtrimit të veprimtarisë;
 - 1.4. kur për shkaqe të paarsyeshme nuk e fillon ushtrimin e veprimtarisë në afat prej katër dhjet e pesë (45) ditësh nga dita e dhënies së licencës;
 - 1.5. kur gjeodeti i licencuar qëndron më tepër se një (1) muaj pa ndërprerë jashtë Republikës së Kosovës, pa njoftuar AKK-në;
 - 1.6. kur pushojnë së plotësuari kushtet, në bazë të të cilave është licencuar.
 - 1.7. me arritjen e moshës shtatëdhjetë (70) vjeçare.

Neni 22
Pezullimi i licencës apo lejes

1. Me kërkesë të gjeodetit të licencuar, komisioni për leje dhe licenca mund të pezulloj licencën në afat prej gjashtë (6) muaj.

2. Me kërkesë të gjeodetit të licencuar, komisioni për leje dhe licenca mund të pezulloj licencën në afat prej një (1) viti me qëllim të shfrytëzimit të pushimit të lehonisë.

3. Me njoftimin e palës për ndërprerjen e marrëdhënies së punës ndërmjet kompanisë dhe gjeodetit, me të cilin është licencuar ajo.

4. Pezullimi nga paragrafi 3. i këtij neni, bëhet në kohëzgjatje deri në tre (3) muaj.

5. Leja e kompanisë gjeodezike pushon kur brenda afatit nga paragrafi 4 i këtij neni nuk plotësohet kushti nga neni 8 paragrafi 1.2 i këtij Udhëzimi Administrativ.

Neni 23

Revokimi i lejes apo licencës për punë

1. Personit fizik apo juridik i merret leja apo licenca në rastet, kur:

1.1. nuk i kryejnë punët dhe shërbimet kadastrale në pajtim me Ligjin nr. 08/L-237 për Kadastër të Pronës së paluajtshme;

1.2. punët, shërbimet dhe llogaritjen e çmimeve për shërbimet e kryera i bëjnë në kundërshtim me tarifatat e përcaktuara në dispozitatat ligjore në fuqi;

1.3. pa arsye mungojnë me tepër se tridhjetë (30) ditë në ushtrimin e profesionit.

2. Revokimi i licencës mund të bëhet pasi t'iu tërhiqet vërejtja më parë nga Komisioni për leje dhe licenca për të metat në punë dhe shkeljen e dispozitave ligjore nga paragrafi 1 i këtij neni dhe të udhëzimeve administrative në fuqi;

3. Licenca mund të revokohet edhe pa tërheqjen e vërejtjes sipas paragrafit 2 të këtij neni, në rastet si në vijim:

3.1. gjeodeti i licencuar apo kompania gjeodezike konstatohet se ka bërë shkelje të rënda të dispozitave ligjore, me të cilat shkaktohen pasoja të pariparueshme, e të cilat janë konstatuar paraprakisht nga ZKK apo AKK; dhe

3.2. gjeodeti i licencuar apo kompania gjeodezike konstatohet se e ka keqpërdor licencën duke e shfrytëzuar atë nga persona të paautorizuar;

4. Personit fizik të licencuar apo personat juridik të pajisur me leje i revokohet licenca apo leja me vendim të komisionit për leje dhe licenca.

5. Personi fizik i licencuar dhe personi juridik i pajisur me leje nuk ka të drejtë të kërkojë dhënien e lejes apo licencimin për punë para se të kalojë afati prej dy (2) viteve nga dita e revokimit të licencës, përkatësisht lejes, sipas paragrafit 3 të këtij neni.

6. Kundër vendimit të komisionit për Leje dhe Licencatë AKK-së për revokimin e lejes apo licencës mund të ushtrohet ankesë në Komisionin për shqyrtimin e ankesave në AKK, brenda afatit prej tridhjetë (30) ditëve nga pranimi i vendimit.

Neni 24 **Testi për licencim**

1. Testin për licencim e përgatit dhe organizon Komisioni për leje dhe licenca.
2. Testi për licencim përmban materien që rregullon fushën e kadastrit, gjeodezisë dhe regjistrimit të të drejtave sendore në Republikën e Kosovës.
3. Testi për licencim kalohet me dhënien e gjashtëdhjetë (60) për qind të përgjigjeve të sakta.
4. Kandidati i cili e ka kaluar testin për licencim, dhe për arsye tjera nuk licencohet, rezultati i testit i vlen një (1) vit.

Neni 25 **Mbikqyrja e punëve kadastrale nga ZKK**

1. Punët kadastrale që kryhen nga personat fizik të licencuar apo personat juridik të pajisur me leje sipas këtij Udhëzimi Administrativ kontrollohen, aprovohen dhe regjistrohen në të dhënat kadastrale nga ZKK-ja apo AKK-ja
2. ZKK kryen punë kadastrale të terrenit vetëm për interes publik me kërkesë të komunës.

Neni 26 **Vazhdimi i lejes apo licencës**

1. Kërkesa për vazhdimin e lejes apo licencës bëhet nëse plotësohen këto kushte:
 - 1.1. Plotësimi i formularit për vazhdimin e licencës;
 - 1.2. Dorëzimi i dokumentacionit të paraparë nga neni 6 paragrafi 1, nën-paragrafët 1.1, 1.2, 1.7, 1.9 dhe 1.11, neni 8, të këtij Udhëzimit Administrativ;
 - 1.3. Licenca paraprake e lëshuar nga Agjencia Kadastrale e Kosovës;
 - 1.4. Pagesa e tarifës së përcaktuar në nenin 12 paragrafi 4 të këtij Udhëzimi Administrativ.
2. Rregullat e përcaktuara në këtë Udhëzim Administrativ për paraqitjen e kërkesës për leje apo licencim, shqyrtimin e kërkesës, ankesën dhe dhënien e licencës, si dhe kohëzgjatjen, zbatohen përshtatshëm gjatë procedurës së vazhdimit të lejes apo licencës.”

Neni 27
Dispozita kalimtare dhe përfundimtare

1. Dispozitat e këtij Udhëzimi Administrativ fillojnë të zbatohen pas hyrjes në fuqi të këtij Udhëzimi Administrativ dhe nuk kanë fuqi retroaktive.
2. Licencat e lëshuara sipas dispozitave të parapara me Udhëzimin Administrativ paraprak vlejnë deri në skadimin e afatit të tyre.
3. Tekniku gjeodet i licencuar i kryen punët dhe shërbimet kadastrale për të cilat është i licencuar deri në skadimin e licencës.

Neni 28
Shfuqizimi

Me hyrjen në fuqi të këtij Udhëzimi Administrativ shfuqizohet Udhëzimi Administrativ MMPH Nr.13/2019 për Licencimin e Kompanive Gjeodezike dhe Gjeodetëve, i ndryshuar dhe plotësuar.

Neni 29
Hyrja në fuqi

Ky Udhëzim Administrativ hynë në fuqi shtatë (7) ditë pas publikimit në Gazetën Zyrtare të Republikës së Kosovës.

Liburn ALIU

Ministër i Ministrisë së Mjedisit, Planifikimit Hapësinor dhe Infrastrukturës

Datë 07.05.2024
Prishtinë